

四庫全書

子部

欽定四庫全書

冊府元龜卷七十八

宋 王欽若等 撰

帝王部

委任第二

隋高祖初為丞相時竇懿定為左右宮伯使鎮守天臺總  
統露門內兩廂仗衛帝宿禁中遇尉遲迥初平朝廷頗  
以山東為意拜榮定為雒州總管以鎮之

宇文忻為豫州總管高祖龍潛時與忻情好甚協及為

丞相恩顧彌隆尉遲迥作亂以忻為行軍總管從韋孝  
寬擊之時兵屯河陽諸軍莫敢先進帝令高頰馳驛監  
軍與頰密謀進取者惟忻而已

李徹字廣達高祖受禪為左武衛將軍及晉王之鎮并  
州也朝廷妙選正人有文武才幹者為之寮佐帝以徹  
前代舊臣數持軍旅詔徹總晉王軍事進爵齊安郡公  
時蜀王秀亦鎮益州帝謂侍臣曰安得文同王子相武  
如李廣達者乎其見重如此

韋世康初仕後周為司會中大夫尉遲迥之作亂高祖  
憂之謂世康曰汾絳舊是周齊分界因此亂階恐生搖  
動今以委公善為吾守因授絳州刺史以雅望鎮之闔  
境清肅開皇中為吏部尚書因侍宴再拜陳讓曰臣無  
尺寸之功位亞台鉉今犬馬齒豸不益明時恐先朝露  
無以塞責願乞骸骨退避賢能帝曰朕夙夜庶幾求賢  
若渴真與公共治天下以致太平今之所請深乖本望  
縱令筋力衰謝猶屈公卧治一隅於是出拜荊州總管

時天下唯置四大總管并揚益三州竝親王臨統唯荆  
州委於世康時論以為羨

于仲文開皇初為行軍元帥統十二部總管帝以尚書  
文簿繁雜吏多奸計令仲文勘錄省中事其所發摘甚  
多帝嘉其明斷厚加勞賞

達奚長孺為荊州總管三十六州軍事高祖謂之曰江  
陵要害國之南門今已委公朕無慮也

令狐熙為汴州刺史高祖以嶺南夷越數為反亂徵拜

桂州總管十七州諸軍事許以便宜從事刺史以下官  
得承制補授給帳內五百人賜帛五百疋發傳送其家  
李雄字毗盧為鴻臚卿晉王出鎮并州以雄為河北行  
臺兵部尚書高祖謂雄曰吾兒既少更事未多以卿兼  
文武才今推誠相委吾無北顧之憂矣雄頓首而言曰  
陛下不以臣不肖寄臣以重任臣雖愚固心非木石謹當  
竭誠效命以答鴻恩獻赦流涕帝慰諭而遣之

高頴平陳後以功授上柱國頴遜位高祖詔曰公識鑒

通遠器略優深出參戎律廓清淮海入司禁旅實委心  
腹自朕受命嘗與機衡竭誠陳力心迹俱盡此則天降  
良輔翊贊朕躬幸無辭費也其優獎如此未幾尚書都  
事姜暉楚州行參軍李君才竝奏稱水旱不調罪繇高  
頴請廢黜之二人俱得罪而去親禮愈密

王誼為大內史時汾州嵇胡為亂誼率兵擊之高祖弟  
越王盛譙王儉雖為總管竝受誼節度其見重如此  
楊昇高祖用為吳州總管時煬帝為晉王鎮揚州詔令

异每歲一與王相見評論得失規諷疑闕

宇文述自開皇中伐陳為行軍總管陳王既擒而蕭瑛  
蕭巖據東吳之地擁兵拒守高祖與述詔曰公鴻勳大  
業名高望重奉國之誠久所知悉金陵之寇既以清蕩  
而吳會之地東路為遙蕭巖蕭瑛竝在其處公率將戎  
旅撫慰彼方振揚國威宣布朝化以公明略乘勝而往  
風行電掃自當稽服若使干戈不用黎庶獲安方副朕  
懷公之力也

煬帝大業中為左衛大將軍與蘇威常與  
選舉參預朝政貴重委任與蘇威等其親



愛則  
過之

蘇威自高祖時拜開府儀同蕪納言民部尚書復蕪大  
理卿京兆尹御史大夫治書侍御史梁毗以威領五職  
而安繁繼劇無舉賢自代之心抗表劾威高祖曰蘇威  
朝夕孜孜志存遠大舉賢有關何遽迫之顧謂威曰用  
之則行舍之則藏惟我與爾有是夫及高祖幸并州命  
與高頴同總留事俄追詣行在所使決民訟後為左光  
祿大夫

場帝即位以威先朝舊臣漸加委任後歲餘復  
為納言與左翊衛大將軍宇文述黃門侍郎裴

矩御史大夫裴蘊內史侍郎虞  
世基參掌朝政時人稱為五貴

煬帝即位數月拜伊州刺史楊約為內史令約有學術  
兼達時務帝甚任之後數載加官右光祿大夫

吐萬緒自高祖時為夏州總管煬帝之在藩也頗見親  
遇及為太子引為右虞侯率及帝嗣位漢王諒時鎮并  
州帝恐其為變拜晉絳二州刺史

王辯為武賁郎將及山東盜賊起上谷魏刀兒自號歷  
山飛衆十餘萬劫掠燕趙煬帝引辯升御榻問以方略

辯論取賊形勢帝稱善曰誠如此計賊何足憂也於是發從行卒步騎三千擊敗之賜黃金二百兩

長孫晟為上開府儀同三司安撫突厥還遇煬帝即位帝引晟於大行前委以內衙宿衛知門禁事即日拜左領軍

元文都大業中為大府卿帝漸任之甚有當時之譽柳肅為工部侍郎煬帝大見親任每行幸遼東嘗委之於涿郡留守

獨孤楷為并州總管遇疾喪明上表乞骸骨帝曰先朝  
舊臣歷職二代高風素望卧以鎮之無勞躬親簿領也  
遣其長子凌雲監省郡事其見重如此

樊子蓋為涼州刺史兼武威太守大業三年入朝帝引  
之內殿特蒙褒美五年煬帝西巡詔加子蓋右光祿大  
夫子蓋表自陳曰臣自南裔即適西垂嘗為外臣未居  
內職不得陪屬車奉丹陛溘死邊城沒有遺恨唯陛下  
察之帝曰公侍朕則一人而已委以西方則萬人之敵

宜識此心六年朝於江都宮還除民部尚書時處羅可汗及高昌王款塞復以子蓋檢校武威太守應接二蕃後帝幸遼東子蓋為東都留守車駕至高陽追詣行在所既而引見帝顧謂子蓋曰朕遣越王留守東都示以皇枝盤石社稷大事終以委公特宜持重戈甲五百人而後出此亦勇夫重閉之義也無賴不軌者便誅鋤之凡可施行無勞形迹今造玉麟符以代銅獸又指越代二王曰今二孫委公與衛文昇耳宜選貞良宿德有方

幅者教習之動靜之節宜思其可於是賜以良田甲第  
衛玄為刑部尚書大業九年煬帝幸遼東使玄與代王  
侑留守京師拜為京兆內史尚書如故許以便宜從事  
勅代王侑待以師傅之禮會楊玄感圍逼東都玄率步  
騎七萬與宇文述等擊破之還鎮京師帝謂之曰關右  
之任一委於公公安社稷乃安公危社稷亦危出入須  
有兵衛坐卧常宜自牢勇夫重閉此其義也今特給千  
兵以充侍從賜以玉麟符玄自以年老上表乞骸骨帝

使內史舍人封德彝馳諭之曰京師國本王業所基宗廟園陵所在藉公耆舊卧以鎮之朕為國計義無相許故遣德彝口陳指意玄乃止

唐高祖武德元年以蕭瑀為中書令時軍國草創方隅未寧高祖雅相禮重委以心腹凡諸政事瑀悉關掌內外詔稟日有千數陳奏便宜多見允納高祖每臨軒聽政常引瑀賜升御榻而坐與言呼之為蕭郎國典朝儀亦責成於瑀

太宗入纂春宮以瑀為太子太保太宗之伐遼東也以雒邑衝要襟帶關河以瑀為

雒陽宮  
留守

竇誕為太常卿加上柱國高祖諸少子荆王元景等未  
出宮者十餘王所有國司家產之事悉付誕檢校焉

韋仁壽為南寧州都督入朝貢方物高祖大悅仁壽復  
請徙居南寧以兵鎮守有詔特聽以便宜從事令益州  
給兵送之

段德操為左武衛將軍延州總管徵令入朝賞勞甚厚  
及建成北討高祖問其方略又勞之曰今者之行以公



為北道主人勉其經略以就功名也

太宗時李勣為并州大都督府長史在并州凡十六年  
令行禁止號為稱職帝謂侍臣曰隋煬帝不能精選賢  
良安撫邊境唯築長城以備突厥情識之惑一至於此  
朕今委任李勣於并州遂使突厥畏威遁走塞垣安靜  
豈不勝遠築長城耶

盧承慶為民部侍郎太宗令承慶兼檢校兵部侍郎仍  
知五品選事承慶辭曰選事職在尚書臣今掌之便是

越局帝不許曰朕今信卿卿何不自信也

楊恭仁為特進貞觀五年十一月以恭仁行雒州都督  
太宗謂之曰雒陽要重古難其人朕之子弟多恐非所  
任特以委公也

劉蘭貞觀十一年為右領軍將軍及太宗行幸雒陽以蜀  
王愔為夏州都督又以蘭為長史愔不之藩而蘭總其  
事封平原郡公尋領檢校代州都督將軍如故

高士廉為尚書右僕射貞觀十五年駕幸洛陽庶人承

乾監國士廉攝太子少師太宗手詔士廉曰端拱三州不憂關中者唯卿是屬蕭何之鎮寄情非淺後加開府儀同三司平章政事車駕問罪遼陽皇太子於定州監國以士廉攝太子太傅仍典朝政璽書勞問不絕

房玄齡為司空太傅知門下省事及太宗親幸遼東以玄齡為京城留守降手詔曰公當蕭何之任朕無西顧之憂矣軍戎器械戰士糧廩竝委玄齡處分發遣在路表奏相望每上言敵不可輕尤宜戒慎

竇靜鎮夏州時擒頡利處其部衆於河南靖以為不便  
上封事諫之雖未從之太宗嘉其忠塞答以優詔曰北  
方之務悉以相委以卿為寧朔大使撫鎮華戎朕無北  
顧之憂矣

李大亮為左衛大將軍高宗居春坊以大亮兼領太子  
右衛率俄兼工部尚書身居三職宿衛兩宮太宗每出  
巡幸多令大亮居守

韋挺為太常卿父冲在隋嘗為營州總管有經略高麗

遺文會太宗將伐遼東挺以聞奏太宗甚悅遂令挺先  
運軍糧河北諸州皆取挺節度仍許以便宜行事帝親  
解貂裘及內廐馬二疋賜之羣公祖道朝野以為榮

楊弘禮為中書舍人太宗有事遼東以弘禮有文武材  
擢拜兵部侍郎專典兵機之務時諸宰相並在定州留輔  
太子唯有褚遂良許敬宗及弘禮在行在所掌知機務  
姜確貞觀中拜宣威將軍守屯衛將軍攝將作如故確  
性恭勤雖祁寒暑雨未嘗暫懈太宗以是益加任使及

營建昭陵確又參與整制以勞正授左屯衛將軍自此之後轉蒙親顧玄武門宿衛及園苑之務皆以為之其屯營飛騎亦分隸於確每有遊幸即領騎而從焉

高宗時張行成為尚書右僕射加授太子少傅因旱抗表請致仕高宗手詔不許仍賜以宮女黃金器物行成又固請乞骸骨帝曰公我之故舊腹心柰何舍我而去因愴然流涕行成不得已復起視事

張文瓘為侍中性嚴正諸司奏議多所糾劾高宗甚親

委之或時卧疾在家朝廷每有大事帝必問諸宰臣與文瓘議未奏云未議者則遣其籌之奏云已議者皆報可

李晦為雍州長史高宗幸維陽以晦為京師留守臨行帝謂晦曰關中之事一以付卿但法律跼之不可以成官政令式之外有異績利於人者隨事即行不須聞奏劉仁軌為太子太傅同中書門下三品高宗幸東都皇太子京師監國遣仁軌及與侍中裴炎中書令薛元超

留輔太子二年赴東都又令太孫重炁京師留守仍令  
仁軌為副弘道元年復拜尚書左僕射同中書門下三  
品文明元年太孫被廢特令仁軌專知留守事仍與仁  
軌書曰昔漢以關中之事專仗蕭何今者託公亦猶於  
古所希耆德敬勗乃誠

薛元超為中書令兼太子左庶子高宗幸東都太子於  
京師監國因留元超以侍太子帝臨行謂元超曰朕之  
留卿如去一臂但吾子未閑庶務關西之事悉以委卿



所寄既深不得不然也

裴炎為侍中高宗幸雒陽令炎留輔太子無知禮部尚書事

薛仁貴為吐蕃所敗坐除名尋而高麗餘衆相率復叛詔起仁貴為鷄林道總管以經略之上元中坐事徙象州會赦歸高宗思其功尋復召見謂曰往九成宮遭水無卿已為魚矣卿又北伐九姓東擊高麗漠北遼東咸遵聲教者竝卿之力也卿雖有過豈可相忘有人言卿

烏海城下故不擊賊致使失利朕所恨者唯此事耳今西邊不靜瓜沙路絕豈可高枕鄉邑不為朕指揮耶於是授瓜州長史

中宗時魏元忠為侍中檢校兵部尚書中宗居諒闇多不視事軍國大政獨委元忠者數月

玄宗時薛納為隴右防禦使開元二年賜納旌節勅王駿臧懷亮王海賓楊楚客等竝受納節度防禦吐蕃如臨時進退致失權宜便以軍法從事四年以納攝御史

大夫持節朔方軍大總管討叛如軍將等臨敵有不用命便以軍法從事

李光弼為太原尹兼太原及北軍州節度使開元十七年正月光表請入朝帝降書曰朔川兵馬飛狐要害委卿經略隨事防虞比來東夷頗盡誠款如聞突厥常欲侵漁部落漸移向東固亦須有備豫凡秋防操練今正其時卿若入朝誰當處置宜識此意且未須來

肅宗時房琯為吏部尚書平章事先是至德元年九月

上皇遣瑄等奏皇帝冊書至順化郡肅宗以瑄素有重名虛心待之瑄亦以天下之務為己任有諫事者獨決之諸宰皆避位莫敢言

郭子儀為司空至德初廣平王為元帥統大將軍東征以子儀為副實總軍政後子儀為司徒中書令充朔方邠寧鄜坊等道節度

肅宗以子儀久為大將得士卒心命鎮絳州詔授朔方河中北庭潞澤州節度行營兵馬副元帥時肅宗不康

引子儀入卧内以河東之事委之子儀流涕哽咽受命而去

代宗初僕固懷恩為工部尚書帝思清河隴以懷恩曉知邊事俾充隴右節度使未行議東征殘寇又改靈州大都護充朔方行營節度使封大寧郡王兼絳州刺史大夫工部尚書如舊尋遷同中書門下平章事時回紇可汗親率甲兵求自效回紇可敦懷恩之女也以是尤委任之

馬璘為四鎮北庭行營以及邠寧節度使代宗以犬戎寢  
驕歲犯郊境涇州最邊戎寇乃詔璘移鎮涇州為涇源  
節度使涇州刺史四鎮北庭行營節度使如故復以鄭  
穎二州隸之

辛雲京為河東節度使代宗以北門委之及薨追悼發  
哀為之流涕

李抱玉為鳳翔節度使時吐蕃每歲犯境代宗以岐  
陽國之西門寄在抱玉恩寵無比遷同中書門下平章

事又兼山南西道節度使河西隴右山南西道副元帥  
判梁州事連統三道節制兼領鳳翔潞梁三大府秩  
處三公

張光晟為單于都護兼御史中丞振武軍使代宗密謂  
之曰北蕃縱橫日久當思所禦之計光晟既受命至鎮  
威令甚行

李勉為滑亳等州觀察使永平軍節度等使代宗以勉  
兼汴州刺史充汴宋等八州節度觀察留後時以汴州

節度都虞侯李靈耀擅殺兵馬使濮州刺史孟鑿潛結田承嗣為援故有是命

德宗時崔祐甫代常袞為門下侍郎平章事尋轉中書侍郎脩國史仍平章事帝初即位庶務皆委宰臣祐甫染疾舉入中書卧而承旨或休假在第每除拜大命必密咨以決焉

李興翰為鹽州兵馬使貞元十九年以為鹽州刺史保塞軍使左神策行營兵馬使其劔南東川西川兵在州



者皆俾興翰主焉鹽州軍使便宜得專達於上鹽州自此不隸夏州

憲宗時高崇文為神策行營節度使憲宗元和元年劔南西川劉闢反憲宗命崇文討闢詔應赴西川應援將士等竝取高崇文處分

杜佑為司徒同平章事歲餘請致仕憲宗以佑筋力未衰面令自今已後每日依往例入朝視事

田弘正為魏博節度使同平章事元和十四年制受檢

校司徒兼侍中依前魏州大都督府長史充魏博等州節度使始弘正入覲乞遂留闕下表凡三入帝謂之曰昨韓弘至朝稱疾懇辭戎務朕不得不從今卿復請留止意誠可尚然魏土樂卿之政隣境服卿之威為我長城不可辭也乃還鎮

穆宗長慶二年四月裴度自河東節度除東都留守至闕除淮南節度初度發太原中途得朱克融王庭湊復書皆許退兵度不敢發以其書奏穆宗喜因遣使宣慰

克融并廷湊入深州取牛元翼又令先於途中命度更發書與廷湊度書因言朝謝後即歸守留務中使見書慮廷湊知度東歸無兵權即背前約遽請度易其即歸之辭并上其書草穆宗方憂深州之圍得度前後書喜甚及度至又自有以悟帝恩待益至故復得兵符

敬宗寶歷元年四月以前神策軍大將軍知軍事兼御史大夫康志睦為檢校工部尚書兼青州刺史御史大夫充平盧軍節度淄青等州觀察使志睦父日知興元

初為趙州刺史時成德軍節度使李寶臣死其子惟岳不奉朝命曰知帥麾下蕃漢步騎二千人自趙歸闕德宗深嘉之歷授官秩至晉慈隰等州節度使睦以父勲於將為神策累遷本軍大將軍至是帝以修謹可委又本忠臣子弟特授此鎮然制下後人情甚不協諫官繼有章疏帝竟不為之止及在鎮頗有理聲

後唐莊宗以郭崇韜為樞密使侍中兼修國史時為宦官所惡帝甚不平及客省使李嚴自蜀使迴且言王衍政

荒民怨人不為使可以鼓行平定其致書侮嫚帝心怒之下詔諸蕃和市戰馬選練兵甲議擇將帥明宗為天下兵馬總管典兵柄廷議當委西征崇韜自以位重勢危將立功以制閹豎乃密奏曰契丹侵軼北面須藉大臣全倚總管鎮禦燕趙臣伏念興聖宮使地當儲副未立殊功宜依本朝故事以親王為元帥付以討伐之權示威名於天下帝方愛繼岌即曰小子蒙幼安能獨行卿當為予擇其副貳崇韜未奏帝曰朕熟思之無踰於

卿是日以繼岌為西南面行營都統以崇韜為諸道兵馬招討使部駕下諸軍六萬發雒陽軍將發帝御嘉慶殿置酒宴西征諸將舉酒囑崇韜曰繼岌小子未習軍機唯卿久從吾征伐兵家變略事之得失屬之於卿無累小子崇韜謝之而發

安元信從莊宗定魏博元城之戰尅捷居多移為博州刺史與梁軍對壘得勝遷元信為右廂排陣使王處直引契丹背盟北邊俶擾以元信久在邊用為大同軍節

度使

袁建豐為內衙副指揮使時北討劉守光建豐常先士卒轉都教練使權蕃漢總管莊宗入鄴以心腹幹能選為魏府都巡檢使

明宗時安重誨為樞密使三上表乞解機務詔不允復面奏乞與臣一鎮以息謗議明宗不悅重誨奏不已明宗怒謂曰放卿出朕自有人即令武德使孟漢瓊至中書與宰臣商量重誨事馮道言曰諸人苟惜安令解樞

務為便趙鳳曰大臣豈可輕動公失言也道等因附漢  
瓊奏曰此斷自宸旨然重臣不可輕議移改繇是兼命  
范延光為樞密使重誨如故

范延光為樞密使上表陳情乞解樞務優詔不允令皇  
城使翟光鄴宣旨云卿避重難則便矣誰當荷重難者  
勿復興言要遂陳請十年為予致太平後即允卿辭避  
帝御中興殿延光稱疾甚上表陳情帝謂樞密使趙延  
壽曰延光又貢章疏懇求退避其意如何莫是朕之失



德不可扶持否延壽曰延光位高責重畏懼滿盈所以  
求退與舊臣迭處祇如臣素無才術因緣戚屬冒昧渥  
恩自掌樞密常多憂惕所希舊臣迭處然後乞在散班  
不謂延光先有陳情延光之心臣知之矣固不願遠違  
宸扆須避樞機但以此職望重責深動貽官謗向來處  
者罕有保全所謂人之所畏不可不畏帝曰卿言是也  
然家國之事仗卿等披榛故人總欲捨予予誰共治卿  
見延光道予此語勉就公參又令中使楊敬達就延光

第宣旨延光又上第三章陳乞優答不允

朱弘昭為山南東道節度使長興四年九月詔為檢校  
太尉同中書門下平章事充樞密使制下弘昭面訴曰  
臣廝養之才智謀極短遇陛下興運驟至方鎮常懼不  
任况內秉大權必孤獎擢伏乞別選才能上叱之曰公  
輩皆欲去朕左右怕在眼前養爾輩何為弘昭退謝不  
敢復言

符彥超為汾州刺史同光末為魏州軍亂天下騷動詔

彥超北京巡檢朝廷先令內養呂鄭二人監兵及倉庫  
明宗入雒皇弟存詔單騎入河東與呂鄭謀殺彥超張  
憲據城自衛彥超知之彥超部下殺呂鄭存詔於衙城  
明宗又令其弟龍武都虞侯彥卿來安撫遂請彥超入  
朝自雪六月彥超入覲明宗便殿召見撫諭曰河東無  
事賴爾盡心也翌日授建雄軍留後未行屬弟曹州刺  
史彥饒殺宣武亂軍安輯汴州明宗甚喜召彥超曰吾  
與爾父為先朝立社稷我於倉皇中軍民推戴又得爾

兄弟氣力我更何憂却為我往河東撫育耆舊授檢校  
司徒北京留守太原尹

閔帝時宋令詢自帝在藩時補為客將知書樂善動皆  
繇禮長興中閔帝連殿大藩遷為都押牙參輔閫政甚  
有時譽閔帝深委之

末帝時符彥饒清泰初以右千牛衛上將軍充左右嚴  
衛都指揮使彥饒舊典禁軍明宗朝立定亂之功今春  
以伯氏安州不治而入宿衛帝親舊也故復委任之

安叔干新授振武節度使賜赴鎮帝面諭狂虜侵寇以爾知虜情狀所以委任賜戎服金帶銀器其牙兵賜物有差又賜茶五百斤馬五十匹

漢高祖時楊邠為樞密使上章以樞密萬幾平章四輔官要事重心力不堪乞解樞機冀逃咎悔帝命中使宣諭邠曰樞機之職捨卿用誰忽有此章莫有人離間卿否宣次宣徽北院使吳虔裕在旁颺言曰樞密重地難以久處俾後來者迭居相公辭讓是也宣使還具言虔

裕道此即日出處裕為鄭州防禦使

周世宗顯德四年冬再幸淮南命樞密使王朴兼東京留守京邑庶務悉以便宜制之比及入蹕都下肅如也

冊府元龜卷七十八

欽定四庫全書

冊府元龜卷七十九

宋 王欽若等 撰

帝王部

慶賜

公羊傳云觸石而出膚寸而合不崇朝而雨天下者其泰山之雲乎夫王者渙然出令沛然施恩浹洽於四方涵濡於萬物其為大也豈直斯乎禮云立春之日賞公卿諸侯大夫於朝行慶施惠下及兆民季春之月布德



行惠命有司發倉廩賜貧窮振乏絕開府庫出幣帛周天下勉諸侯立夏之日乃行慶賜無不欣悅書云大賚於四海而萬姓悅服又云一人有慶兆民賴之詩云蓼蕭澤及四海也此皆經義之著明者焉至若合醪以昭慈醑飲以宣惠牛酒穀帛以振孤窮賜爵版授以寵者老蓋班王澤和人心表治道之隆平示生民之愷樂者也然則古人有言羔豚而祭百官皆足太牢而祭不必有餘取其平施之義耳

周武王克殷散鹿臺之財發鉅橋之粟大賚於四海萬  
姓悅服

漢高祖為漢王二年二月賜民爵

爵者祿位民賜爵  
有罪得以減也

五年五月詔曰軍吏卒會赦其亡罪而亡爵及不滿大夫  
者皆賜爵為大夫故大夫以上賜爵各一級其七大夫  
以上皆令食邑非七大夫以下皆復其身及戶勿事

復其

身及一戶之內  
皆不徭賦也

惠帝即位賜民爵一級中郎郎中滿六歲爵三級四歲

二級

中郎省也

外郎滿六歲二級

外郎散郎也

中郎不滿一歲

一級外郎不滿二歲賜錢萬

謂作郎未經一歲二歲耳

宦官尚食比

郎中

宦官閣寺也尚主也舊有五尚尚冠尚帳尚衣尚席主天子物曰尚主文書曰尚書又有尚符璽郎也漢儀注

省中有五尚而內官婦人有諸尚

謁者執楯執戟武士騶比外郎

執楯執戟親近陛衛

也武士力士也高祖使武士縛韓信是也騶騎也本廐之御者後又為騎因謂騶騎

太子御駿乘

賜爵五大夫舍人滿五歲二級

武士騶以上皆舊侍從天子之人也舍人以上

太子之官屬

賜給喪事者二千石錢二萬六百石以上萬五

百石二百石以下至佐史五千

律有斗食佐史若丞曹史書佐也自五百石下

至於佐史皆賜五千今又視作斤上者將軍四十金上

言二百石者審備其等也

壙上也斤開也開土地為冢壙故以斤言之四十金四十斤金也近上二千石賜錢二萬此言四十金實金也

下凡言黃金真金也不言黃謂錢也食貨志黃金一斤直萬錢諸賜言黃金者皆與之金不言黃者一金與萬

錢也二千石二十金六百石以上六金五百石以下至佐史二金減田租復十五稅一

漢家初十五稅一儉於周十稅一也中間廢今復之

一云秦作阿房之宮收大半之賦遂行至此乃復十五而稅一

元年十二月賜民爵一級  
五年九月長安城成賜民爵一級

文帝即位下詔曰丞相太尉御史大夫間者諸呂用事擅權謀為大逆欲危劉氏宗廟賴將相大臣列侯宗室誅之皆伏其辜朕初即位其赦天下賜民爵一級女子

百戶牛酒

男賜爵女子賜牛酒賜爵者一家之長得之也女子謂賜爵者之妻子率百戶共得牛若

千頭酒若干 石無定數也 醕五日

漢律三人已上無故羣飲罰金四兩今恩詔橫賜得令聚會飲食五

日醕布也言天子布恩於天下史記趙惠文王三年大赦置酒大醕五日

景帝元年四月赦天下賜民爵一級

三年十二月立皇子端為膠西王勝為中山王賜民爵

一級四年六月赦天下賜民爵一級

七年二月丁巳立膠東王徹為皇太子賜民爵一級

中元年夏四月大赦天下賜民爵一級

五年六月大赦天下賜民爵一級

後元年三月大赦天下賜民爵一級中二千石諸侯  
相爵右庶長夏大酺

三年正月皇太子冠賜民為父後者爵一級

武帝建元元年二月赦天下賜民爵一級年八十復二

筭九十復甲卒

二算復二口之算也復甲卒不豫草車之賦也

元光元年四月赦天下賜民長子爵一級

二年九月令民大酺五日

元朔三年秋令民大酺五日

元狩元年四月丁卯立皇太子賜中二千石爵右庶長

民為父後者一級又詔曰朕嘉孝悌力田衰夫老眊孤

寡鰥獨或匱於衣食甚憐愍焉其遣謁者巡行天下存

問致賜曰皇帝使謁者賜縣三老孝者帛人五匹鄉三

老弟者力田帛人三匹年九十以上及鰥寡孤獨帛人

二匹絮三斤八十以上米人三石有寃失職使者以聞

縣鄉即賜毋贅聚

贅會也各遣就所居處賜之勿會聚

六年十月賜丞相以下至吏二千石金千石以下至

乘從者帛

乘騎諸從者也

蠻夷錦各有差

元鼎元年夏五月赦天下大酺五日

四年十月行幸雍五時賜民爵一級百戶牛酒

元封元年四月上登封太山還詔曰其以十月為元封



元年行所巡至博奉高蛇丘歷城梁父民田租逋賦貸已除加年七十以上孤寡帛人二匹四縣無出今年算

賜天下民爵一級女子百戶牛酒

自博至梁父凡五縣今云四縣毋出算者

奉高一縣素以供神非笑服也

二年四月上祠泰山塞決河還赦所過徒賜孤獨高年米人四石六月甘泉宮生芝九莖賜雲陽都百戶牛酒

都謂縣之所居在宮側者且賜不徧其境內故止稱其都非謂天子之都也

五年夏四月詔曰朕巡荆揚輯江淮物會大海氣以合

泰山

輯合也物神也會合海神之氣合致於泰山然後修封總祭饗也

上天見象增修

封禪其赦天下所幸縣無出今年租賦賜鰥寡孤獨帛

貧窮者粟

六年三月祠后土賜天下貧民布帛人一匹

太初二年三月行幸河東祠后土令天下酺五日

太始三年春正月行幸甘泉二月幸東海登之罘浮大

海冬賜所過戶五千錢鰥寡孤獨帛人一匹

二月令天下大酺五日

昭帝始元元年春二月黃鵠下建章宮太液池中公卿上壽賜諸侯宗室金錢各有差

七月赦天下賜民百戶牛酒

四年六月皇后見高廟賜長公主丞相將軍列侯中二千石以下及郎吏宗室錢帛各有差徙三輔富人雲陵賜錢戶十萬

五年六月賜中二千石以下至吏民爵各有差

元鳳二年夏四月上自建章宮徙未央宮大置酒賜郎

從官帛及宗室子錢人二十萬吏民獻牛酒者賜帛人一匹

四年正月丁亥帝加元服見於高廟賜諸侯王丞相大將軍列侯宗室下至吏民金帛牛酒各有差賜中二千石以下及天下民爵毋收四年五年口賦三年以前逋更賦未入者皆勿收賜天下酺五日

宣帝元年七月即位十一月壬子立皇后許氏賜諸侯王以下金錢至吏民鰥寡孤獨各有差

本始元年五月鳳凰集膠東千乘赦天下賜吏二千石  
諸侯相下至中都官宦吏六百石爵各有差自左更至  
五大夫賜天下人爵一級孝者二級女子百戶牛酒租  
稅勿收

二年六月尊武帝廟為世宗廟賜民爵一級女子百戶  
牛酒

四年三月乙卯立皇后霍氏賜丞相以下至都郎吏從  
官金錢帛各有差赦天下

地節三年四月戊申立皇太子大赦天下賜御史大夫  
爵關內侯中二千石爵右庶長天下當為父後者爵一  
級賜廣陵王黃金千斤諸侯王十五人黃金各百金列  
侯在國者八十七人黃金各人二十斤

元康元年三月詔曰廼者鳳凰集泰山陳留甘露降未  
央宮朕未能章先帝休烈協寧百姓承天順地調序四  
時獲蒙嘉瑞賜茲祉福夙夜兢兢靡有驕色內省匪懈  
永惟罔極書不云乎鳳凰來儀庶尹允諧其赦天下徒

賜勤事吏中二千石以下至六百石爵自中郎吏至五大夫佐史以上二級民一級女子百戶牛酒加賜鰥寡孤獨三老孝弟力田帛所賑貸勿收

二年二月乙丑立皇后王氏賜丞相以下至郎從官錢帛各有差三月以鳳凰甘露降集賜天下吏爵二級民一級女子百戶牛酒鰥寡孤獨高年帛

三年春以神雀數集泰山賜諸侯王丞相將軍列侯二千石金郎從官帛各有差賜天下吏爵二級民一級女

子百戶牛酒鰥寡孤獨高年帛

四年三月詔曰廼者神雀五采以萬數集長樂未央北宮高寢甘泉泰畤殿中及上林苑朕之不逮寡於德厚屢獲嘉祥非朕之任其賜天下吏爵二級民一級女子百戶牛酒加賜三老孝弟力田帛人二匹鰥寡孤獨各一匹

神爵元年三月行幸河東祠后土詔曰朕承宗廟戰戰

栗栗惟萬事統

統緒也

未燭厥理廼元康四年嘉穀玄稷



降於郡國神爵仍集金芝九莖產於承德殿銅池中允  
真獻奇獸南郡獲白虎威鳳為寶朕之不明震於珍物

獲珍物而心驚動也飭躬齋精祈為百姓東濟大河天氣清淨神

魚舞河幸萬歲宮神雀翔集朕之不德懼不能任其以  
五年為神雀元年賜天下勤事吏爵二級民一級女子  
百戶牛酒鰥寡孤獨高年帛所賑貸物勿收行所過毋

出田租

四年二月詔曰廼者鳳凰甘露降集京師嘉瑞竝見修

興泰一五帝后土之祠祈為百姓蒙祉福鸞鳳萬舉翬  
覽翱翔集止於旁齋戒之暮神光顯著薦鬯之夕神光  
交錯或降於天或登於地或從四方來集於壇上帝嘉  
饗海內承福其赦天下賜民爵一級女子百戶牛酒鰥  
寡孤獨高年帛

五鳳元年正月皇太子冠皇太后賜丞相將軍列侯中  
二千石帛人百匹大夫人八十匹夫人六十匹又賜列  
侯嗣子爵五大夫男子為父後者爵一級

三年三月詔曰往者匈奴數為邊寇百姓被其害朕承至尊未能綏安匈奴虛閭權渠單于請求和親病死右賢王屠耆堂代立骨肉大臣立虛閭權渠單于子為呼韓邪單于擊殺屠耆堂諸王竝自立分為五單于更相攻擊死者以萬數畜產大耗十八九人民饑餓相燔燒以求食因大乖亂單于闕氏闕氏音馬支子孫昆弟及呼遼累單于名王右伊秩訾且渠當戶以下伊秩訾且渠當戶皆匈奴官號也訾音于移切且音子余切將衆五萬餘人求降歸義單于稱臣使弟

奉珍朝賀正月北邊晏安靡有兵革之事朕飭躬齋戒  
郊上帝祠后土神光竝見或興於谷燭耀齋宮十有餘  
刻甘露降神雀集已詔有司告祠上帝宗廟三月辛丑  
日鸞鳳又集長樂宮東闕中樹上

門外闕內行  
馬之裏樹

飛下止

地文章五色留十餘刻吏民竝觀朕之不敏懼不能任

婁蒙嘉瑞

婁古  
屢字

獲茲祉福書不云乎雖休勿休祇事不

怠公卿大夫其勗哉減天下口錢赦殊死以下賜民爵一  
級女子百戶牛酒大酺五日加賜鰥寡孤獨高年者帛

甘露二年詔曰廼者鳳凰甘露降集黃龍登興醴泉滂

流枯槁榮茂神光竝見咸受禎祥其赦天下減民筭三

年一筭減錢三十也賜諸侯王丞相將軍列侯中二千石金錢

各有差賜民爵一級女子百戶牛酒鰥寡孤獨高年帛

三年二月詔曰廼者鳳凰集新蔡羣鳥四面行列皆鄉

鳳凰立以萬數其賜汝南太守帛百匹新蔡長吏三老

孝弟力田鰥寡孤獨各有差賜民爵二級毋出今年租

元帝初元元年四月賜宗室有屬籍者馬一匹至二駟

二駟  
八匹

三老孝者帛五疋弟者力田三疋鰥寡孤獨二疋

吏民五十户牛酒

二年正月行幸甘泉郊泰時賜雲陽民爵一級女子百

户牛酒四月丁巳立皇太子賜御史大夫爵關内侯中

二千石左庶長天下當為父後者爵一級列侯錢各二

十萬五大夫十萬

四年正月行幸甘泉郊泰時三月行幸河東祀后土赦

汾陰徒賜民爵一級女子百户牛酒鰥寡孤獨高年帛

行所過無出租賦

五年四月賜宗室有屬籍者馬一匹至二駟三老孝者  
帛人五疋弟者力田三疋鰥寡孤獨二疋吏民五十戶

牛酒

永光二年正月行幸甘泉郊泰畤赦雲陽徒賜民爵一  
級女子百戶牛酒高年帛行所過毋出租稅

三月賜吏六百石以上爵五大夫勤事吏二級民一級  
女子百戶牛酒鰥寡孤獨高年帛

三年二月賜民爵一級女子百戶牛酒鰥寡孤獨高年  
三老孝弟力田帛又賜諸侯王公主列侯黃金中二千  
石以下至中都官長吏各有差吏六百石以上爵五大  
夫勤事吏各二級

建昭五年二月賜民爵一級女子百戶牛酒三老孝弟  
力田帛

竟寧元年正月皇太子冠賜列侯嗣子爵五大夫天下  
為父後者爵一級



成帝建始元年二月賜諸侯王丞相將軍列侯王太后

公主王主

天子女曰公主秩比公也王主諸侯王之女也則公主謂王主者王自主婚謂公主者父

自主婚也

吏二千石黃金宗室諸官吏千石以下至二百石

及宗室子有屬籍者三老孝弟力田鰥寡孤獨錢帛各

有差賜吏民五十戶牛酒

三年春三月赦天下徒賜孝弟力田爵二級

河平四年正月匈奴單于來朝赦天下徒賜孝弟力田

爵二級

鴻嘉元年二月賜天下民爵一級女子百戶牛酒加賜鰥寡孤獨高年帛

永始四年正月行幸甘泉賜雲陽吏民爵女子百戶牛酒鰥寡孤獨高年帛

三月行幸河東祀后土賜吏民如雲陽行所過無出田租

元延四年三月甘露降京師賜長安民牛酒

哀帝以綏和二年四月丙午即位大赦天下賜宗室王

子有屬者

屬謂親未盡  
尚有服者

馬各一駟吏民爵百戶牛酒三

老孝弟力田鰥寡孤獨帛

建平元年三月賜諸侯王公列侯丞相將軍中二千石  
中都官郎吏金錢帛各有差

四年五月賜中二千石至六百石及天下男子爵

平帝元始元年春正月賜天下民爵一級吏在位二百

石以上一切秩滿如真

時諸官有試守者特加  
非常之恩令如真耳

又賜初

徵即位所過縣邑吏二千石以下至佐史爵各有差

四年二月賜九卿以下至六百石宗室有屬籍者爵自  
五大夫以上各有差賜天下民爵一級鰥寡孤獨高年  
帛

後漢光武建武二年立貴人郭氏為皇后子疆為皇太  
子大赦增郎謁者從官秩各一等

十九年九月南巡狩幸汝南南頓縣舍置酒會賜吏人

復南頓田租歲

歲一  
歲也

二十九年二月賜天下男子爵人二級

三十年四月賜天下男子爵人二級

三十一年賜天下男子爵人二級

明帝以中元二年二月即位四月丙辰詔曰予末小子  
奉承聖業夙夜震畏不敢荒寧先帝受命中興德侔帝  
王協和萬邦格於上下懷柔百神惠於鰥寡朕承大運  
繼體守文不知稼穡之艱難懼有廢失聖恩遺戒顧重  
天下以元元為首公卿百僚將何以輔朕不逮其賜天  
下男子爵人二級三老孝弟力田人三級爵過公乘得

移與子若同產子及流人無名數欲自占者人一級鰥  
寡孤獨篤癡粟人十斛其弛刑及郡國從在中元元年  
四月己卯赦前所犯而後捕繫者悉免其刑又邊人遭  
亂為內郡人妻在己卯赦前一切遣還邊恣其所樂中  
二千石下至黃綬貶秩贖論者悉皆復秩還贖

永平二年十月行養老禮畧詔曰光武皇帝建三朝之  
禮而未及臨饗眇眇小子屬當聖業間暮春吉辰初行  
大射令月元日復踐辟雍尊事三老兄事五更安車輓

輪供綏執授侯王設醬公卿饌珍朕親袒割執爵而酌  
祝哽在前祝噎在後升歌鹿鳴下管新宮朕固薄德曷  
以克當易陳負乘詩刺彼其永念慙疚無忘厥心三老  
李躬年耆學明五更桓榮授朕尚書詩曰無德不報無  
言不酬其賜榮爵闕內侯食邑五千戶三老五更皆以  
二千石祿終厥身其賜天下三老酒人一石肉四十斤  
有司其存耆耄恤幼孤惠鰥寡稱朕意焉

十一月帝幸河東所過賜二千石令長史以下至於掾

史各有差

三年二月立貴人馬氏為皇后子烜為皇太子賜天下  
男子爵人二級三老孝弟力田人三級流人無名數欲  
占者人一級鰥寡孤獨篤疾貧不能自存者粟人五斛

四年二月詔京師冬無宿雪春不煖沐

煖音于六  
反沐濯澤也音

木暄潤  
之氣也

煩勞羣司積精禱求而比再得時雨宿麥潤澤

其賜公卿半奉有司勉遵時政務平刑罰

六年二月王雒山出寶鼎賜三公帛五十匹九卿二千



石半之

十二年五月丙辰賜天下男子爵人二級三老孝弟力田人三級流民無名數欲占者人一級鰥寡孤獨篤癡貧無家屬不能自存者粟人三斛

十五年四月賜天下男子爵人三級郎從官二十歲已上帛百匹十歲已上二十匹十歲已下十匹官府吏五匹書佐小史三匹令天下大酺五日

十七年五月以祥物顯應遠人著化其賜天下男子爵

人二級三老孝弟力田人三級流人無名數欲占者人  
一級鰥寡孤獨篤癯貧不能自存者粟人三斛郎從官  
視事十歲以上者帛十匹中二千石二千石以下至黃  
綬貶秩奉贖在去年以來皆還贖

十八年四月己未詔曰自春以來時雨不降宿麥傷旱  
秋種未下政失厥中憂懼而已其賜天下男子爵人二  
級流民無名數欲占者人一級鰥寡孤獨篤癯貧不能  
自存者粟人三斛

章帝永平十八年八月即位十月丁未大赦天下賜民爵人二級為父後及孝弟力田人三級脫無名數及流人欲占者人一級爵過公乘得移與子若同產子鰥寡孤獨篤癡貧不能自存者粟人三斛

建初三年二月癸巳立貴人竇氏為皇后賜爵人二級三老孝弟力田人三級民無名數及流民欲占者人一級鰥寡孤獨篤癡貧不能自存者粟人五斛

四年四月戊子立皇子慶為皇太子賜爵人二級三老

孝弟力田人三級民無名數及流民欲自占者人一級  
鰥寡孤獨篤癯貧不能自存者粟人五斛

七年八月飲酎高廟禘祭光武皇帝孝明皇帝甲辰詔  
書云祖考來格明哲之祀予末小子質又菲薄仰惟先  
帝烝烝之情前脩禘祭以盡孝敬朕得識昭穆之序寄  
遠祖之思今年大禮復舉加以先帝之坐悲傷感懷樂  
以迎來哀以送往雖祭已如在而空虛不知所裁庶或  
饗之豈忘克慎肅雍之臣辟公之相皆助朕之依依今

賜公錢四十萬卿半之及百官執事各有差

九月車駕進幸鄴勞饗魏郡守令已下至於三老門闌  
走卒賜錢各有差勞賜常山趙國吏人復元氏租賦三  
歲

元和二年五月戊申詔曰乃者鳳凰黃龍鸞鳥比集七  
郡或一郡再見白鳥神雀甘露數臻祖宗舊事或班恩  
施其賜天下吏爵人三級高年鰥寡孤獨帛人一匹經  
曰無侮鰥寡惠此甦獨加賜河南女子百戶牛酒令天

下大酺五日賜公卿以下錢帛各有差及雒陽人當酺者布戶一疋城外三戶共一疋賜博士員弟子見在太學者布人三匹

九月壬辰詔鳳凰黃龍所見亭部無出二年租賦

東觀記曰

鳳凰見肥城句窳亭槐樹上古今註云黃龍見洛陽元延亭部窳音庾

加賜男子爵人二

級先見者布二十匹近者三匹太守三十匹令長十五匹丞尉半之詩云雖無德與汝式歌且舞他如賜爵故

事

和帝永元二年五月賜公卿以下至佐史錢布各有差

三年正月甲子皇帝加元服

元首也謂加冠於首儀禮冠者先筮日後筮賓東觀

記曰時太后詔袁安為賓賜束帛乘馬

賜諸侯王公將軍特進中二千石

列侯宗室子孫在京師奉朝請者黃金將大夫郎吏從官帛賜民爵及粟帛各有差大酺五日庚辰賜京師民酺布兩戶共一匹

十月癸未行幸長安詔曰北狄破滅名王仍降西域諸國納貢內附豈非祖宗迪哲重光之鴻烈歟寤寐歎息

想望舊京其賜行所過二千石長吏以下及三老官屬  
錢帛各有差鰥寡孤獨篤癯貧不能自存者粟人三斛  
四年八月賜公卿以下至佐史錢穀各有差

八年二月己丑立貴人陰氏為皇后賜天下男子爵人  
二級三老孝弟力田三級民無名數及流民欲占者一  
級鰥寡孤獨篤癯貧不能自存者粟人五斛

十二年三月詔賜天下男子爵人二級三老孝弟力田  
三級民無名數及流民欲占者人一級鰥寡孤獨篤癯



貧不能自存者粟人三斛壬子賜博士員弟子在太學者布人三匹

十五年九月南巡狩清河王慶濟北王壽河間王開竝從賜所過二千石長吏以下三老官屬及民百年者錢布各有差

十一月車駕巡狩還宮賜從臣及留者公卿以下錢布各有差

元興元年十二月立皇子隆為皇太子賜天下男子爵

人二級三老孝弟力田人三級民無名數及流民欲占者人一級鰥寡孤獨篤癘貧不能自存者粟人三斛

安帝永初三年正月庚子加元服大赦天下賜王主貴人公卿以下金帛各有差男子為父後及三老孝弟力田爵人三級流民欲占者人一級

六年五月旱丙寅詔令中二千石下至黃綬一切復秩還贖賜爵各有差

元初元年正月甲子改元賜民爵人二級孝弟力田人

三級爵過公乘得移與子若同產同產子民脫無名數  
及流民欲占者人一級鰥寡孤獨篤癡不能自存者穀  
人三斛貞婦帛人一匹

永寧元年四月丙寅立皇子保為皇太子賜王主三公  
列侯以下至郎吏從官金帛又賜民爵及布粟各有差  
建光元年二月癸亥大赦天下賜諸園貴人王主公卿  
以下錢帛各有差四月賜鰥寡孤獨貧不能自存者穀  
人三斛

延光元年三月大赦改元賜民爵及三老孝弟力田人  
二級加賜鰥寡孤獨篤癯貧不能自存者粟人三斛貞  
婦帛人二匹

三年二月濟南上言鳳凰集臺縣丞霍收舍樹上賜臺  
長帛五十匹丞三十匹尉半之吏卒人三匹鳳凰所過  
亭部無出今年田租賜男子爵人二級

順帝以延光四年十一月丁巳即位己卯賜公卿以下  
錢穀各有差

永建元年正月大赦天下賜男子爵人二級為父後三  
老孝弟力田人三級流民欲自占者一級鰥寡孤獨篤  
癯貧不能自存者粟人五斛貞婦帛人三匹

二月賜百官隨輦宿衛及拜除者各有差

十二月賜王主貴人公卿以下布各有差

四年正月丙子帝加元服賜王主貴人公卿以下金帛  
各有差賜男子爵及流民欲占者人一級為父後三老  
孝弟力田人二級鰥寡孤獨篤癯貧不能自存者帛一

匹

陽嘉元年正月乙巳立皇后梁氏賜爵人二級三老孝弟力田三級爵過公乘得移與子若同產同產子民無名數及流民欲占者人一級鰥寡孤獨篤癡貧不能自存者粟人五斛

三年五月大赦天下賜民年八十以上米一斛肉二十斤酒五斗九十以上加賜帛人二匹絮三斤

永和四年四月戊午大赦天下賜民爵及粟帛各有差

建康元年四月辛巳立皇太子恢為皇太子改年建康  
大赦天下賜爵人各有差

桓帝建和元年正月大赦天下賜吏更勞一歲男子爵  
人二級為父後及三老孝弟力田人三級鰥寡孤獨篤  
癯貧不能自存者粟人五斛貞婦帛人三匹

二年正月甲子皇帝加元服庚午大赦天下賜河間渤海  
二王黃金各百斤彭城諸國王各五十斤公主大將  
軍三公特進侯中二千石二千石將大夫郎吏從官四

姓及梁鄧小侯諸大夫以下帛各有差年八十以上賜米酒肉九十以上加帛二匹綿三斤

永興二年十一月甲辰校獵上林苑遂至函谷關賜所過道旁年九十以上錢各有差

延熹二年十月行幸長安賜長安民粟人十斛園陵人五斛行所過縣三斛

靈帝建寧元年二月大赦天下賜民爵及帛各有差

獻帝建安九年十一月賜三公以下金帛各有差自是



三年一賜以為常制

十年九月賜百官尤貧者金帛各有差

二十年正月甲子立貴人曹氏為皇后賜天下男子爵  
人一級孝弟力田二級賜諸王侯公卿以下穀各有差  
延康元年四月饒安縣言白兔雉見賜饒安田租渤海  
郡百戶牛酒大酺三日

魏文帝初嗣丞相魏王位以漢延康元年二月賜諸侯  
王將相以下大將粟一萬斛帛一千匹金銀各有差等

黃初元年十一月受漢禪賜男子爵人一級為父後及孝弟力田人二級封爵增位各有差

三年立皇后郭氏賜天下男子爵人二級鰥寡孤獨篤癃及貧不能自存者賜穀

明帝青龍元年正月甲申青龍見郊之摩陂井中二月丁酉幸摩陂觀龍於是改年改摩陂為龍陂賜男子爵人二級鰥寡孤獨無出今年租賦

景初二年十二月辛巳立皇后賜天下男子爵人二級

鰥寡孤獨穀

齊王正始元年八月車駕巡省雒陽界秋稼賜高年力田各有差

四年正月帝加元服賜羣臣各有差

陳留王以甘露五年六月甲寅嗣位大赦賜民爵及穀帛各有差

晉武帝太始元年十二月丙寅受魏禪賜天下爵人五級鰥寡孤獨不能自存者穀人五斛丁卯以驃騎將軍石

苞為大司馬封樂陵公車騎將軍陳騫為高平公衛將  
軍賈充為車騎將軍魯公尚書令裴秀為鉅鹿公侍中  
荀勗為濟北公太保鄭克為太傅壽光公太尉王祥為  
太保睢陵公丞相何曾為太尉朗陵公御史大夫王沉  
為驃騎將軍博陵公司空荀顛為臨淮公鎮北大將軍衛  
瓘為菑陽公其餘增封進爵各有差文武竝增位二等  
戊辰詔大弘儉約出御府珠玉玩好之物頒賜王公以  
下各有差

三年九月賜王公以下帛各有差

四年正月律令成封爵賜帛各有差庚寅詔曰使四方之內棄末反本競農務功能奉宣朕志令百姓勤事樂業者其唯郡縣長吏乎先之勞之在於不倦每念經營職事亦為勤矣其以中左典收種草馬賜縣令長相及郡國丞各一匹

六年十一月幸辟雍行鄉飲酒之禮賜太常博士學生帛牛酒各有差

七年正月丙午皇太子冠賜王公以下帛各有差

咸寧元年二月以奉祿薄賜公卿以下帛各有差

二年正月賜諸散吏至於士卒絲各有差

十月丁卯立皇后楊氏賜王公以下及於鰥寡各有差

太康元年三月以吳平大赦改元大酺五日恤孤老困

窮

二年三月賜王公以下吳生口各有差

十年十一月帝疾瘳賜王公以下帛有差

惠帝永平元年二月甲寅賜王公以下帛各有差五月  
賜孝弟高年鰥寡力田者帛人三匹

十一月大酺五日

永寧元年四月齊王冏等舉兵誅趙王倫乘輿反正大  
赦改元孤寡賜穀五斛大酺五日

六月戊辰大赦增吏位二等

太安元年六月癸卯立清河王遐子覃為皇太子賜孤  
寡帛大酺五日

元帝大興元年三月即位大赦改元文武增位二等

明帝太寧三年三月戊辰立皇子衍為皇太子大赦增文武位二等大酺三日賜鰥寡孤獨帛人二匹

成帝以太寧三年閏三月己丑即位大赦增文武位二等賜鰥寡孤獨帛人二匹

咸和元年二月丁亥大赦改元大酺五日賜鰥寡孤老米人二斛

咸康元年正月庚午朔帝加元服大赦改元增文武位



一等大酺三日賜鰥寡孤獨不能自存者粟五斛

康帝以咸康八年六月甲午即位十二月增文武位二

等

穆帝升平元年正月加元服大赦改元增文武位二等  
八月立皇后何氏大赦賜孝弟鰥寡米五斛逋租宿債  
皆勿收大酺三日

簡文帝以咸安元年十一月己酉即位戊午大赦天下  
大酺五日增文武位二等孝順忠貞鰥寡孤獨米人五

斛已未賜桓溫軍三萬人布一匹米一斛

孝武寧康三年八月立皇后王氏大赦加文武位二等  
太元元年五月大赦增文武位各一等

安帝隆安元年春正月己亥朔加元服改元增文武位  
一等

義熙元年桓玄誅乘輿反正大赦賜百姓爵二級鰥寡  
孤獨穀人五斛大酺五日

後魏道武登國二年正月班賜功臣長孫嵩等七十三

人各有差

三年五月癸亥北征庫莫奚六月大破之獲其四部雜畜十餘萬渡弱落水班賞將士各有差

六年十月戊戌北征蠕蠕追之及於大磧南林山下大破之班賜從臣各有差十二月既滅衛辰車駕次於鹽池自河以南諸部悉平簿其珍寶畜產名馬三十餘萬匹牛羊四百餘萬頭班賜大臣各有差

七年五月班賜諸官馬牛羊各有差

十年破慕容寶衆獲文武將吏數千人器甲輜重軍資  
雜財十餘萬計班賞大臣將校各有差

皇始二年十月破慕容麟衆獲其所傳皇帝璽綬圖  
書府庫珍寶簿列數萬班賜功臣及將士各有差

天興二年二月大破高車雜種還次牛川及薄山刻石  
記功班賜從臣各有差

七月辛酉大閱於鹿苑饗賜各有差

三年正月賜羣臣布帛各有差

天賜元年十有一月諸部子孫失業賜爵者三千餘人  
明元永興三年七月戊申賜衛士酺三日布帛各有差  
辛酉賜附國大夫錦罽衣服各有差

四年八月壬子命民大酺三日己卯賜王公以下至宿  
衛將士布帛各有差

五年二月賜陽平王熙及諸王公侯將士布帛各有差  
神瑞元年正月辛巳幸繁峙賜王公以下至於士卒百  
工布帛各有差

二年正月車駕至自北伐賜從征將士布帛各有差

二月賜附國大渠帥朝歲首者繒帛金罽各有差

泰常五年正月庚戌朔自薛林東還至於屋竇城享勞將士大酺二日班禽獸以賜之

七月丁未幸雲中太室賜從者大酺

七年正月自雲中西行幸屋竇城賜從者大酺三日蕃渠帥繒帛各有差

太武始光二年十月車駕至自北伐以其雜畜班賜將

士各有差

三年正月車駕至自北伐班軍實以賜將士行留各有差

七月築馬射臺於長川帝親登臺觀走馬王公諸國軍長馳射中者賜金帛繒絮各有差

四年正月車駕至自西伐賜留臺文武生口繒帛馬牛各有差

七月築壇于祚嶺戲馬馳射賜射中者金帛繒絮各有差

八月至自西伐飲至策勲告於宗廟班軍實以賜留臺  
百僚各有差

神麇四年正月平赫連定車駕次於木根山大享羣臣  
賜布帛各有差

二月癸酉車駕還宮飲至策勲告於宗廟賜留臺百官  
各有差

延和元年八月討馮文通拔冀陽虜獲生口班賜將士  
各有差



三年正月乙未車駕次於汝水大饗羣臣班賜各有差  
太延元年六月詔曰比者以來禎瑞仍臻其令天下大  
酺五日

正平元年正月丙戌朔大會羣臣於江上文武受爵  
三百餘人

三月車駕至自南伐賜留臺文武所獲軍資生口各有  
差

文成以正平二年十月戊申即位改興安元年十二月

甲申文武各加位一等

初帝班賜百僚謂征北將軍源賀曰朕大賚善人卿其任意取之

勿謙退也賀辭固使取之

賀唯取戎馬一匹而已

二年正月戊戌詔曰朕以眇身纂承大業懼不能宣慈  
惠和寧濟萬邦夙夜兢兢若臨淵谷然即位以來百姓  
晏安風雨順序邊方無事衆瑞兼呈不可勝數又於苑  
內獲方寸玉印其文曰子孫長壽羣公卿士咸曰休哉  
豈朕一人克臻斯應實繇天地祖宗降祐之所至也思  
與兆庶共茲嘉慶其令民大酺三日

太安四年二月行幸遼西登碣石山觀滄海大饗羣臣  
於上班賞進爵各有差改碣石山為樂游山築壇記  
行於海濱

和平三年四月河內人張超於懷樓新城北故佛圖處  
獲玉印以獻印方二寸其文曰富樂日昌永保無疆福  
祿日臻長享萬年玉色光潤模制精巧百僚咸曰神明  
所授非人所為也詔天下大酺三日

孝文延興三年十月癸巳太上皇帝南巡至於懷州所

過問民疾苦賜高年孝弟力田布帛

太和元年十月癸酉宴京邑耆老年七十以上於太華殿賜以衣服

四年六月丁卯以澍雨大洽曲赦京師以紬綾絹布百萬匹及南伐所俘賜王公以下

七月壬子改作東明觀詔會京師耆老賜錦綵衣服几杖稻米蜜麵復家人不徭役

五年二月辛卯朔大赦天下賜孝弟力田孤貧不能自

存者穀帛有差

四月壬子以南俘萬餘口班賜羣臣

六年三月辛巳幸武州山石窟寺賜貧老者衣服

十七年正月壬子胡帝享百僚於太極殿乙丑詔曰夫

駿奔入覲臣下之常式錫馬賜車君人之恒惠今諸邊

君蕃裔皆虔集象魏趨鏘紫庭貢享既畢言旋無遠各

可依秩賜車旗衣馬務令優厚其武興宕昌各賜錦綵

繒纊一千吐谷渾世子八百鄧至世子雖因事至都亦

宜賚及可賜三百命數之差皆依別牒

七月癸丑以皇太子立詔賜民為父後者爵一級為公士曾為吏屬者爵二級為上造鰥寡孤獨不能自存者粟人五斛

八月帝南伐車駕至泗州民年七十以上賜爵一級路見眇跛者停駕親問所經傷民秋稼者畝給穀五斛戊辰濟河詔雒懷并泗所過四州之民百年以上假縣令九十以上賜爵三級八十以上賜爵二級七十以上賜爵一級

鰥寡孤獨不能自存者粟人五斛布二匹

十月詔京師及諸州從戎者賜爵一級應募者加二級  
主將加三級

十八年車駕南巡詔相充豫三州百年以上假縣令九  
十以上賜爵二級七十以上賜爵一級孤老鰥寡不能  
自存者賜粟五石帛二匹

八月帝幸懷朔諸鎮還所過皆親見高年問民疾苦貧  
窘孤老賜以粟帛

十一月辛未朔詔冀定二州民百年以上假以縣令九十以上賜爵三級八十以上賜爵二級七十以上賜爵一級鰥寡孤獨不能自存者賜以穀帛

十二月車駕南伐丁卯詔鄂豫二州之民百齡以上假縣令九十以上賜爵三級八十以上賜爵二級七十以上賜爵一級孤寡鰥老不能自存者賜以穀帛

十九年正月講武於汝水之西賚六軍

四月車駕幸彭城辛亥詔賜百歲以上假縣令九十以



上賜爵三級八十以上賜爵二級七十以上賜爵一級  
孤寡老疾不能自存者賜以穀帛已未行幸瑕丘詔諸  
宿衛武官增位一級庚申行幸魯城詔賜兗州民爵及  
粟帛

五月帝自南伐行飲至之禮頒賜有差六月帝自伐齊  
回詔濟州東郡滎陽及河南諸縣車駕所經者百年以  
上賜假縣令九十以上賜爵三級八十以上賜爵二級  
七十以上賜爵一級孤老鰥寡不能自存者賜穀帛

十月甲辰曲赦相州民百年以上假郡守九十以上假縣令八十以上賜爵三級七十以上賜爵一級孤老痼疾不能自存者賜與穀帛

十二月甲子引見羣臣於光極堂班賜冠服

二十一年正月丙申立皇子恪為皇太子賜天下為父後者爵二級

二月乙丑詔并州士人年六十以上假以郡守三月甲寅詔汾州民百年以上假縣令九十以上賜爵三級八

十以上賜爵二級七十以上賜爵一級

五月車駕汎渭入河詔雍州士人百年以上假華郡太守九十以上假荒郡八十以上假華縣令七十以上假荒縣庶老以年各減一等七十以上賜爵三級其營船之夫賜爵一級鰥寡孤貧窮痾廢疾各賜帛二匹穀五斛宣武景明二年二月庚午宿衛之官進位一級

三年七月詔加文官從征顯達宿衛者二階閒散者一階

十二月饗羣臣於太極前殿賜帛有差以殿初成也

正始四年九月詔曰朕秉歷承天履年將紀徙正宮極  
歲浹歸餘台懿茂親祇勤已久列司英彥庸績未酬非  
所謂有功見知賞以時及其以司空高陽王雍為太尉  
尚書令廣陽王嘉為司空百官悉進位一級

延昌元年十一月詔曰朕運承天休統御宸宇太子體  
籍靈蔭肇建宮華明兩既孚三善方洽宜澤均率壤榮  
汎庶裔其賜天下為父後者爵一級孝子順孫庶夫節

婦旌表門閭量給粟帛

孝明以延昌四年正月即位三月乙丑進文武羣臣位  
一級

熙平元年二月克碶石三月以碶石俘虜分賜百僚

神龜元年正月詔曰朕冲昧撫運政道未康民之疾苦  
弗遑紀恤夙宵矜慨鑒寐深懷眷彼百齡悼茲六極京  
畿百年以上給大郡板九十以上給小郡板八十以上  
給大縣板七十以上給小縣板諸州百姓百歲以上給

小郡板九十以上給上縣板八十以上給中縣板鰥寡孤獨不能自存者賜粟五斛帛二匹

正光元年七月辛卯帝加元服大赦改元內外百官進位一等

孝昌元年六月癸未大赦改年詔文武之官從軍二百日  
文官優一級武官優二級

孝莊建義元年四月詔從太原王爾朱榮督將軍士普加五階在京文官兩階武官三階

永安二年四月詔內外百寮普汎加三級庚子詔太原王爾朱榮將士汎加二級

是月又詔上黨百年以下九十以上板三品郡八十以上四品郡七十以上五品郡

七月戊辰破元顥庚午車駕入居華林園大赦詔隨駕文武諸立義加汎五級河北執事之官二級河南立義及迎駕之官并中途扈從亦二級又詔諸州郡遣使奉表行營者普加一大階

三年十月戊申皇太子生大赦天下文武百寮汎加二級

前廢帝初即位改普泰元年三月詔内外文武普汎四階合敘未定第者亦沾一級潁川王爾朱兆彭城王爾朱仲遠隴西王爾朱天光樂平王爾朱世隆常山王爾朱度律車騎儀同三司高歡都督斛斯椿下軍士普汎六級後廢帝以普泰元年十月即位文武百官普汎四級

出帝太昌元年五月乙巳幸華林都亭宴羣臣以班賚



有差

六月戊寅詔內外百官普汎六級在京百寮加中興四級義師將士並加軍汎六級在鄴百官三級河北同義之州兩級河橋建義者加五級關西三級

八月壬戌朔齊文襄王來朝讌射班賚部下各有差

永熙二年正月己亥車駕幸崧高石窟靈巖寺庚子又幸散施各有差

八月己丑齊文襄王來朝帝讌於華林都亭班賚部下

各有差

後周閔帝元年

時不建紀號

正月辛丑受西魏禪即天王位

丁未會百官於乾安殿班賞各有差

三月庚子會文武百官班賜各有差

九月庚申詔曰朕聞君臨天下者非絲一人時乃上下同心所致今文武之官及諸軍人不需封者宜各進兩大階

明帝二年七月順陽獻三足烏詔文武官並進二級

武成二年三月辛酉重陽閣成會羣公列將卿大夫及突厥使者於芳林園賜錢帛各有差

武帝保定元年正月戊申改元詔曰加號既新惠澤宜洽文武百官各增四級

是月丙子大射於正武殿賜百官各有差

二年五月庚午以山南衆瑞並集百官及軍人普汎二級

天和元年正月癸未改元百官並加四級

三年三月癸卯皇后阿史那氏至自突厥行親迎之禮  
丁未大會百寮及四方賓客於路寢賜衣馬錢帛各有  
差

建德元年四月癸巳立魯王贇為皇太子百官各有封  
級

十一月庚戌行幸羌橋集京城以東諸軍都督以上頒  
賜有差

十二月壬申行幸斜谷集京城以西諸軍都督以上頒

賜有差

二年六月壬子皇孫衍生文武官普加一階

三年十月行幸同州十一月戊子至自同州大會衛官及軍人以上賜錢帛各有差

六年三月丙午以平齊論定諸軍勲置酒於齊太極殿會軍士以上頒賜有差

宣帝大象二年二月丁亥賜百官及民大酺

隋文帝開皇二年十月庚寅帝疾愈享百寮於觀德殿

賜錢帛皆任其自取盡力而出

三年三月庚申宴百僚班賜各有差

四年八月以秦王俊納妃宴百僚班賜各有差

八年九月丁丑宴南征諸將班賜各有差

九年四月庚戌帝御廣陽門宴平陳將士班賜各有差  
初大軍出時勅有司曰亡國物我一不以入府可於苑  
內築五堞當悉賜文武百官大射以取之及是帝御立  
堂大射陳其奴婢貨賂會王公文武官七品以上武職領

兵部督以上及諸考使以射之

十二年十一月辛亥有事於南郊壬子宴百僚班賜各有差

十七年二月壬寅以河東王昭納妃宴羣臣班賜各有差

五月庚申宴百僚於玉女泉班賜各有差

十九年正月戊寅大射武德殿宴賜百官

煬帝大業五年二月戊申帝自東都還丙辰宴耆舊四

百人於武德殿班賜各有差

六年四月丁未帝在江都宴淮南父老班賜各有差

七年二月己未升釣臺臨揚子津大宴百僚頒賜各有差

八年四月丙申赦詔高年之老賜以粟帛無賜天下大酺

十一年正月乙卯大會蠻夷設魚龍曼延之樂班賜各有差



唐高祖武德元年五月甲子即位戊辰宴羣臣賜帛有  
差七月己未賜百僚及義士布帛各有差八月庚子宴  
設三品以上賜雜綵各有差十一月己酉太宗降薛仁  
果帝聞而大悅因置酒高會奏九部樂賜羣臣錢各有  
差癸亥太宗凱旋獻俘甲子帝置酒宴旋師及骨咄祿  
特覲於玄武門賜帛各有差十二月乙酉幸周氏坡過  
故莊丙戌校獵置酒高會極歡而罷賜錢絹各有差  
二年二月癸巳宴羣臣奏九部樂賜錢各有差極歡而

罷五月戊辰宴并州從五品以上於仁壽殿帝極歡賜帛各有差

三年四月壬戌太宗平開州悉復故地帝大悅置酒含章殿宴羣臣極歡遣入御府賜繒綵皆重負而出六月癸丑幸昆明池宴從官賜錢各有差八月庚戌宴羣臣奏九部樂於庭賜布帛各有差

四年四月壬寅皇太子建成北討班師帝於玄武門宴勞將士賜帛各有差五月丁丑以太宗平王世充獻捷

於京師宴羣臣賜帛各有差七月戊辰宴羣臣奏九部  
樂於庭帝舉酒屬百官極歡乃罷賜錢帛各有差九月  
癸亥賜五品以上射於武德殿賞金銀綾綺各有差閏  
十月乙卯幸稷州己未次於武功舊莊從官賜錢各有  
差庚申召父老故吏男女數百人置酒高會賜帛各有  
差

五年正月辛丑賜羣臣大射於玄武門賚綵帛各有差  
壬子幸昆明池宴從官賜帛各有差三月己酉宴羣臣

及京城父老賜帛各有差七月丙戌以太宗征劉黑闥  
班師宴旋師賜帛各有差

六年三月己丑宴五品以上於昭德殿賜帛各有差  
四月己未幸故宅改名通義宮置酒高會賜從官帛各  
有差十月甲辰宴羣臣賜物各有差慶有年也

七年三月己卯幸琅琊公主第宴從官五品以上賚各  
有差四月癸卯宴羣臣賜帛各有差丙午宴王公親屬  
於文明殿帝賦詩王公遞上壽賜帛各有差七月壬子

幸東宮從官下至胥徒頒賜有差

八年正月甲寅幸太宗第宴五品以下賜帛各有差

二月甲午幸齊王元吉第宴五品以上賚物各有差

五月乙巳宴五品以上及外戚於內殿賜綵極歡而罷

十二月庚辰狩於鳴犢泉之野辛巳還宮宴從官賚物

綵帛各有差

九年六月癸亥立太宗為皇太子所司具禮以時冊命  
宴羣臣賜帛各有差又詔凡厥庶政事無大小悉委皇


太子斷決既溥天同慶宜加惠澤為父後者若有勲爵皆令襲繼諸赤牒擬授職事官見任者竝即為真其已得贊者參選之日聽依階叙文武官人節級頒賜務存優給稱朕意焉

七月高祖傳位於太宗稱太上皇後四年乃徙居大安宮於是親侍輿輦百僚陪從太上皇甚悅置酒高會極歡而罷賜物各有差

太宗後與公卿謁太上皇於戢武殿置酒為歡乙夜方

散賜帛各有差

後太宗演武於城西太上皇親勞將士置酒於故未央宮宴三品以上極夜方散賜物各有差



冊府元龜卷七十九